

四庫全書

史部

欽定四庫全書

史部

會稽志卷六

詳校官監察御史臣沈孫鍾

檢討臣德生覆勘

總校官知縣臣楊懋珩

校對官編修臣盧遂

謄錄監生臣陳元熙

欽定四庫全書

會稽志卷六

宋 施宿等 撰

陵寢

紹興元年四月十四日奉隆祐皇太后遺誥斂以常服  
不得用金玉寶貝權宜就近擇地攢殯候軍事寧息歸  
葬園陵所製梓宮取周吾身勿拘舊制以為他日遷奉  
之便此攢宮之始也以是月十七日大殮遂治攢宮李  
回為總護使胡直孺為橋道頓遞使故事皇太后又嘗

垂簾當以相臣為山陵使是時范宗尹當軸而止用執政為總護使他官亦不備置者以攢宮故比陵寢少異也

自是用此為故事故不詳錄

自四月至六月甫三十五日而攢宮

告成蓋議者謂他日歸祔泰陵則山陵之制始當畢講今皆當畧於是總護使首辭所賜銀絹橋道頓遞使亦辭而乞受其半章誼在臺中劾之橋道頓遞使遂亦盡辭而公使錢每料纔支三百貫不得過三料蓋不及千緡比故例省費幾四十萬貫方是時上距欽聖憲肅皇

后山陵已三十餘年中更變故圖籍無在者而朝士多  
新進亦鮮能知於是以新江東轉運副使曾紆嘗為欽  
聖山陵使司官屬命為兩浙轉運副使專修奉攢宮使  
臣張宗吏人朱宸皆自言嘗經欽聖山陵差使省記當  
時施行次第亦命服役攢宮卜地在越州會稽縣然道  
路橋梁之類皆命越州所管八縣分地修營至紹興十  
三年六月徽宗皇帝顯肅皇后憲節皇后靈駕自行在  
發引初隆祐攢宮稱昭慈聖獻皇后攢宮至是以不可

備稱帝后尊號詔以永祐陵攢宮為稱

其後永思陵永阜陵永崇陵並

用此為故事

而攢宮自祖宗時有殿攢啟攢之名皆用殯字

至顯仁皇太后祔永祐陵攢宮始並以攢字易之起居  
郎熊克著中興小歷云先是有持陰陽家說欲廣攢宮  
禁域為二十里有墓在其間者皆當徙去浙東帥臣王  
師心力言其不可時監察御史任文薦奉詔監掩殯宮就  
令按視於是獲免者七百六十有奇又薦獻之物舊取  
於民師心請以上供錢給其直從之

濮王園廟

濮安懿王在英宗皇帝時以瑩為園即園立廟俾王子  
孫世襲濮國自主祭祀行之累朝紹興中以濮邸宗室  
有在遠未集行在者故久闕嗣王止以見在行高者為  
主奉濮安懿王祠事久之乃復除嗣王濮園既阻絕廟  
祐寓會稽之天寧寺今為報恩光孝寺蓋以英祖初詔有立廟  
京師之戒故止寓會稽嘗時講求亦詳矣十三年主奉  
祠事賀王士會請即光孝之法堂為廟而闢寺西隅南

嚮為廟門如舊制置衛甚謹其香火官吏出入繇別門  
園令一人以濮邸諸王孫充嗣濮王奉朝請歲以春秋  
來薦獻亦循舊制也

### 大禹陵

禹巡守江南上苗山會計諸侯死而葬焉猶舜陟方而  
死遂葬蒼梧聖人所以送終事最簡易非若漢世人主  
豫自起陵也劉向書云禹葬會稽不改其列謂不改林  
木百物之列也苗山自禹葬後更名會稽是山之東有



隴隱若劍脊西嚮而下下有窆石或云此正葬處疑未  
敢信然檀弓註天子六緯四碑所以下棺則窆石者固  
碑之制度至其數不同或由繁簡異宜或世代悠遠所  
存止此皆不可知也窆石之左是為禹廟背湖而南嚮  
然則古之宮廟固有依立隴而立者按皇覽禹塚在會  
稽山自先秦古書帝王墓皆不稱陵而陵之名實自漢  
始舊經云禹陵在會稽縣南一十三里

### 祠廟

府城

城隍顯寧廟在子城內卧龍山之西南自昔紀載皆云  
神姓龐諱玉按唐書忠義傳實龐堅四世祖也京兆  
涇陽人魁梧有力明兵法仕隋為監門直閣李密據  
洛口寢逼東都王以關中銳兵屬王世充擊之百戰  
不衄煬帝崩乃率萬騎歸唐時唐室新造諸將起於  
行伍高祖以王隋之舊臣久宿衛習朝廷制度拜領  
軍武衛二大將軍俾為諸將模矧秦王尤所親倚常

從征伐薛舉寇涇川拔高撫舉死子仁杲勢益張秦  
王命梁實營淺水原賊將宗羅睺攻之甚力王於是  
奮擊士卒殊死戰秦王以勁兵擣其背羅睺大敗遂  
擒仁杲平隴西尋為越州總管威望甚著盜不敢犯  
其境武德二年召還巴山獠叛除梁州都督悉討平  
之

越州題名記與新唐書所載先後不同詳見馬萬頃所述王傳

召為監門大將軍

卒太宗為輟朝贈工部尚書幽州都督初王鎮越惠  
澤在民既卒邦人追懷之祠以為城隍神梁開平二

年吳越武肅王上其事封崇福侯

五代會要作開平元年

紹興

元年詔以駐蹕會稽踰年妖祲不作行殿載寧城隍  
崇福侯廟賜額顯寧封昭佑公三十年顯仁皇后靈  
駕渡江無虞加號忠順乾道五年加號孚應八年加  
號顯惠淳熙三年封忠應王後又加號昭順靈濟孚  
佑郡人奉祀甚謹以九月十二日為神生日享薦尤  
盛

護國旌忠廟在子城內自昔陝西出兵祈禱三聖必獲

顯應當睦寇作是邦得三聖陰祐遂建廟紹興元年  
宣撫處置使張秦據吳玠陳請乞於鳳翔府和尚原  
立三聖廟賜額旌忠烈靈應王忠顯昭應王忠  
惠順應王所至廟祀一用是額

崇善王廟在府衙蓬萊閣西

五通廟在子城內

吳越武肅王廟在府南四里三百二十六步本甚閎壯  
歲久墮圯今僅餘四楹有巨碑舊在廡下今乃立荒

園中皮光業之詞也具載唐長興七年吳越王棄宮  
館後二年嗣王建廟於越按長興後唐明宗年號止  
於四年而崩歷閔帝清泰帝凡三年而晉高祖即位  
改元天福若不數閔帝清泰則七年乃天福元年劉  
恕吳越紀年稱天福元年七月乙卯立武肅王廟於  
東府今攷之碑與紀年雖不同其實皆歲丁酉清泰  
廢閔帝為鄂王晉祖追貶清泰為庶人皆削其年號  
而天福改元以其年十一月則十一月以前皆長興

七年矣漢高祖削晉出帝開運之號稱天福十二年亦用此比也然武肅王實以壬辰歲薨文穆王襲位壬辰蓋長興三年不得云長興七年矣吳越王棄宮館後二年嗣王建廟於越也按五代史及劉恕紀年開皇紀吳越備史皆言武肅王以三年薨則碑為誤然碑當時立光業為其國丞相亦不應誤繆至此蓋皆不可知光業日休子紹興中王裔孫咎叔廣言廟中神像雖從者及伶人皆坐示不可遷也

旌忠廟在府南三里二百六十六步建炎四年十一月  
高宗皇帝自建康東巡會稽大臣呂頤浩等建議請  
移蹕四明會金報踵至遂行命李鄴守會稽鄴嘗使  
金至是畏死不能守遂降金大酋烏珠在錢塘遣其  
下號帕克巴太師者為偽知州並檄鄴為偽同知日同  
視事於府出則並馬而行郡士民多懷忠憤然莫敢  
先發初大駕之行詔百司分半扈從而親兵輦官長  
入祇候亦止以三千人從行有衛士唐琦者不得在



行中琦開封人資忠勇自誓與金偕死以報國會帕  
克巴太師出乃懷巨磚欲邀擊殺之復疑從騎衆恐不  
克成功顧視道傍有小閣乃趨上適俯見一人過即  
奮磚擊之不中中其騎從騎羣至遂執以見帕克巴鄴  
共坐問故琦大罵不絕曰吾欲碎爾首死作趙氏  
鬼耳帕克巴氣折曰大金兵數百萬汝殺我一人何益  
琦曰汝敢來為此州主故欲殺汝又顧鄴曰我請官  
一石五斗米尚不肯以負國汝受國厚恩何為乃爾

豈人類耶金亟命

闕

之罵猶

闕

大駕再之會稽

闕

即為立廟且以其事

聞請

闕

又郡

闕

詔移發

闕

讀者凜然增忠義之氣

闕

乙巳冬金大入塞太上皇內禪幸浙明年

正月金兵徑犯京師議和於城下而還是年再犯京

師明年春二聖出狩漠五月今天子即位又

明年冬金深入渡淮已酉二月遂犯揚州天子幸杭

其冬金分兩道寇江浙其一由武昌渡江犯洪州六  
宮百司衛從隆祐后遷於虔以避之金自洪進兵西  
南至瀏陽西北至建昌撫其一由歷陽渡破建康陷  
太平廣德進破杭渡錢塘江入越陷明州天子自越  
幸明自明航海幸溫今年二月金人自明越而西復  
陷秀陷平江達於鎮江並山鑿河通道建康卒以其  
衆並所掠吳越之人濟江而北裴回於淮南至於今  
去否所不得知也嗚呼金內侵六年國家之難生民

之禍至此極矣前世未有也士大夫畏避至不敢誦  
言金為賊其能為吾宋仗節死難者與有幾侯以衛  
士武人生不知書遇亂憤發顧不能愛其死狙擊金  
酋慢罵降帥至死猶不絕口其義豈惟今之人所希  
見古書傳所載何以尚茲嗚呼偉哉崧卿時治兵在  
衢方道路梗絕旁郡縣行事往往不相聞知惟侯之  
事謀者爭相傳以為美談至一日十許告聞者相與  
嘆惜有為流涕者或恨不與之偕死已而崧卿守越

凡在越之人類能言之參攷既審亟以其事聞天子  
愍嘉之詔議追褒而邦之人復相與請建祠宇以旌  
侯之忠以勸來者乃作今廟方須其成請額於朝且  
記其事於石未果而崧卿既以病免矣於其行日姑  
以不腆之酒禮於像貌之前而致告焉後帥陳汝錫  
復以為言詔賜額曰旌忠隆興中帥吳芾增葺屬其  
客陳澤作修廟記今在廟中

東嶽行宮在府東南四里一百六十二步

保寧王廟在府東南四里二百八十六步

助海侯廟在府西北三里三百一十六步

越王廟在府西北二里

興武侯廟在府西北四里一百三十七步

鮑郎廟在府南二里二百四步

愍孝廟在府東北二百七十九步孝子蔡定父革以傭

書自給惟定一子命為進士建炎元年革以事逮捕

繫獄年七十當贖吏持不可定祈哀太守願以身代

不報會大雨雪定嘆曰生無益於親當以死繼萬一  
有司憐而釋之因自撰墓銘并訴牒一道寘諸懷服  
巾紵趨府橋下自湛而死太守翟公汝文聞之亟命  
出其父且給輅以葬定死後七年太守王公綯始克  
請於朝賜廟額曰愍孝

會稽縣

城隍廟

闕

舜廟在府城南七十里述異記云會稽山有虞舜巡守

臺

禹廟在縣東南一十二里越絕書云少康立祠於禹陵  
所梁時修廟唯欠一梁俄風雨大至湖中得一木取  
以為梁即梅梁也夜或大雷雨梁輒失去比復歸水  
草被其上人以為神縻以大鐵繩然猶時一失之政  
和四年勅即廟為道士觀賜額曰告成禹陵舊在廟  
旁今不知所在獨有當時窆石尚存高丈許狀如稱  
權廟東廡祭祠嗣王啟而越王句踐亦祭別室鏡湖



在廟之下為放生池臨池有咸若亭又有明遠閣懷  
勤亭懷勤取建炎御製詩登臺望稽嶺懷哉夏禹勤  
之句

南鎮廟在縣南一十三里周禮職方揚州之鎮山曰會  
稽隋開皇十四年詔南鎮會稽山就山立祠取其旁  
巫一人主灑掃且命多時松柏天寶十載封會稽山  
為永興軍每歲一祭以南郊迎氣日國朝乾德六年  
詔問禮官五鎮見祭罷祭之由時以會稽山在吳越

國乃下其國行祭事淳化二年秘書監李

至言五郊

迎氣之日皆祭逐方嶽鎮海瀆自唐亂離之後有不  
在封域者遂闕其祭國家克復四方間雖奉詔特祭  
未著常祀望遵舊禮就迎氣日各祭於所隸之州長  
吏以此為獻官從之其後立夏日祀南鎮會稽山永  
興公於越州

越王廟在縣東南一十二里

曹娥廟在縣東七十二里娥上虞人父盱能弦歌為巫

祝漢安二年五月五日於縣江沂濤迎波神溺死屍  
不得娥年十四緣江號泣晝夜不絕旬有七日遂投  
江而死元嘉元年縣長度尚改葬於江南道旁為立  
碑焉墓今在廟之左碑有晉右將軍王逸少所書小  
字新定吳茂先師中嘗刻於廟中今為好事者持去  
國朝熙寧十年十月詔曹娥孝女墳廟載祀典又有  
朱娥者上虞民朱四女母亡養於祖母娥十歲祖母  
與里中朱顏鬪被刃娥趣救之得免而娥連被數十

刃絕吭而死治平二年太守章公闕以其事聞賜其家粟帛會稽縣令董階以娥配食曹娥至今在焉

馬太守廟在縣東南三里八十步太守名臻字叔苻永和五年創立鏡湖在會稽山陰二縣界築塘蓄水水高於田田高於海各丈餘水少則泄湖溉田水多則泄田水入海塘周四百一十里溉田九千餘頃會稽記云創湖之始多毀塚宅有千餘人怨訴臻

被刑於市及遣使按復絕不見人閱籍皆先死者  
云唐韋瓘修廟記云開元中刺史張楚深念功本  
爰立祠宇久而侈敗今皇帝後元九年觀察使孟  
公崇大棟梁孟公簡也其在越乃元和中記云後  
元蓋省文爾

孔府君廟在縣南二十五里又謂之孔官廟按世說  
孔車騎少有嘉遁意年四十餘始應安東命未仕  
官時常獨寢歌吹自箴誨自稱孔郎遊散名山百

姓謂有道術為生立廟今猶有孔郎廟

陳朝公主廟在縣東八十五里

嚴司徒廟在縣三十五里相傳云司徒助也

興善將軍廟在縣東四十里白塔吳越忠懿王建

鄭太尉廟在縣東南一十五里廟之下即樵風湓也舊

在山麓今遷山上

的耳潭龍王廟在縣東北一十里

防風廟在縣東北二十五里禹誅防風氏此其遺迹

樊將軍廟在縣東四十里

青山廟在攢宮神路側舊名伏虎大王廟在青山下後

遷

靈應廟在昭慈聖獻皇后攢宮復土後立在禁地內

山陰縣

城隍廟在縣東五步

塗山禹廟在縣西北四十五里

事具塗山

馬太守廟在縣西六十四里

事具會稽

項羽廟在縣南十五里項里溪上以亞父范增配食不知其始歲月傍有聚落數十戶歲時奉祀

福闕王廟在縣西北七里

感聖侯廟在縣西北二十里

聖姥廟在縣西南三十里

贊禹龍王廟在縣南二里

銅井瑞澤龍王廟在縣西七十里

秦望山靈惠侯廟在縣南三十里



漢太守朱公廟在縣東北三江門外四里

柳姑廟在縣西一十里湖桑埭之東前臨鏡湖蓋湖

山絕勝處也鄉人舊傳以為羅江東隱嘗題詩今

不傳

靈助侯廟在縣西四十五里錢清鎮

景氏廟在縣西九里三山之東山石堰上又有一景氏

廟在縣西七里吉宅村俚俗傳以為二景本伯仲死

而為神能福其民故至今四時祀之吉宅之景氏廟

叢木陰翳居大澤中四絕不通或云舊每為立廟輒  
為菑故至今但露祭而已按景氏與昭屈同為楚之  
望姓疑二景非近世人云

嵯縣

城隍廟在縣西五十步

東嶽廟在縣北一里

上善濟物侯廟在縣北四十五里五十步嵯浦按酈道  
元水經注云廟甚靈驗行人及樵伐者皆致敬焉若

有侵竊則必為蛇虎所傷今雖不聞有蛇虎之異而邑有水旱必先致禱又嘉祐進士何淹記云侯姓陳氏為台州之仙居令晉天福中有封誥

南天嶽廟在縣南一十里

簞山廟在縣南四十五里

靈輝廟在縣西北三十里水旱疫癘祈禱輒應鄉民謂之靈威王不知得封在何代乾道八年賜令額

東石鼓廟在縣東七十里西石鼓廟在縣西二十里大

抵剡多石鼓廟村聚往往有之歲常以春秋祭皆能  
福其民蓋一方所奉神也

黃姥岑廟在縣東二里輿地志云縣東門外有黃姥神  
祠民多奉事之

石姥廟在縣西六十里

保邦興福廟在縣西六十五里

仙姑廟在縣西六十里

三女廟在縣西二十五里有墓

猪烏五龍堂在縣西四十里

正順忠祐靈濟昭烈王廟在縣北一百八十步

東白巖廟在縣東二十五里

威勇王廟在縣西三十里

佑順侯胡侍郎祠在縣西五十里兵部侍郎胡則嫫

之永康人嘗奏免衢嫫身丁錢民被其賜廟祀於

衢嫫之間無慮數十胡歿於慶厯中廟初未有封

爵永康之民因宣和中封方巖神為佑順侯牽合

以為胡侍郎凡婺州境內皆以佑順為名故嵎亦承誤焉

阮仙翁廟在縣南一十里

惠應廟在縣西六十里舊號蘇明王廟宣和四年賜今額

西嚮王廟在縣西三十五里

顯應廟在縣西四十里祠初建於赤烏二年神嘗為令此邑有惠政廟食於此歲久失其姓宣和辛丑

睦寇起蔓延旁境魔黨響應剡縣屠戮焚蕩尤酷  
一夕四山旗幟車蓋隱隱出入雲間見者咸疑神  
游而廟不存矣視之果煨燼未幾又有復見如前  
日之異若反旆而來賊徒忽驚呼曰天兵至矣遂  
自相攻殺官軍未至賊已殲盡鄉人相與復築廟  
宇甚盛旱潦疾疫有禱必驗紹興十一年詔賜額  
顯應鄉人姚公憲為諫議大夫率鄉人陳於府縣  
詔封靈祐侯

諸暨縣

城隍廟在縣西北三十步

秦始皇廟在縣西一里會稽記云始皇崩邑人刻木為像祀之配食夏禹後漢太守王朗棄其像江中像乃汭流而上人以為異復立廟唐葉天師焚之開元十九年縣尉吳勵之再建慶歷五年知縣寇中舍毀之改作迴車院今院側仍有小廟存

烏帶廟在縣東北四十五里烏帶山夏侯曾先地志云



梁武帝遣烏簋採石英於此山而卒後人立廟帶簋聲之誤也

范相廟在縣東南五里蓋祀越相范蠡

福順王廟在縣西南二里

松山朱太尉廟在縣西五十里

五通廟在縣西北四十里

靈女臺廟在縣東北二十五里

白龍堂在縣東北四十里

五泄夾巖廟在縣西四十里

柵潭明王廟在縣東七里

亭閣廟在縣西南二十里

五泄龍堂在三學院側境接富陽浦江東西兩源會為飛瀑五折而下雪濺雷吼聲聞數百步有湫幽邃神龍所宅過者雖伏暑亦慘凜歲旱禱雨輒應嘉祐中縣主簿吳伯固處厚禱焉刻石記之說者謂瀑水奇不減廬山天台鴈蕩石門然名不甚著為可恨

東嶽廟在縣東南五里金雞山下大觀四年置洪氏夷  
堅志頗記其異

俞柳仙判官廟在縣東南孝義鄉父老傳有姓俞者久  
寓村媪家病革語媪曰死以兩大甕合以葬我扛折  
則寔鄉人如其說復夢俞曰今為天曹雨雪部判官  
會野火且至烈日中雨雪冢上遠近異之即其地立  
祠紹興初久旱迎神至大雄寺禱雨立應歲以大稔  
相傳神喜柳枝邑人致禱必持柳枝以獻因號柳仙

云

柳鮑仙姑廟在縣東南孝義鄉廟負山帶溪景趣勝絕  
父老以溪聲高下卜雨暘甚驗人皆異之

蕭山縣

城隍崇福侯廟在縣南五十步蓋郡城隍初封也

西殿寧邦保慶王廟在縣西三十五里隋大業中有孔  
大夫者為陳果仁裨將討東陽賊婁世幹降之立廟  
黃山唐光化二年吳越武肅王上其事封惠人侯後

加封今額

寘護廟在縣東四十里舊號駐師侯廟紹興三十年以顯仁皇后靈駕所由勅賜寘護廟仍封顯佑侯淳熙十五年加號昭烈慶元五年加號翊順

昭佑廟在縣東四十三里漢乾祐元年封保江寧波王蓋吳越王有國時也宣和三年賜今額

寧濟廟在縣西南一十三里西興鎮政和三年賜今額六年高麗入貢使者將至而潮不應有司請禱潮即

大至詔封順應侯宣和三年進封武濟公紹興十四  
年徽宗皇帝靈駕渡江加武顯仁皇太后合祔加武  
濟忠應翊順公淳熙十五年高宗靈駕之行顯應尤  
異先數日太守侍郎張公杓躬視漲沙沿御舟入浦  
去處盡護以紅竹詰朝方集萬夫迨潮落沙已蕩盡  
水去所立之竹纔尺許及虞祭畢沙復漲塞莫不驚  
異於是詔加武濟忠應翊順靈佑公慶元四年憲聖  
慈烈太皇太后歸祔永思將渡江會大雨震電隨禱

而止遂賜王爵是為孚祐王慶元六年十二月永崇  
歲事畢進封孚惠善佑王

武祐廟在縣北二里舊號北嶺將軍廟方臘陷錢塘欲  
東犯會稽其衆見將軍掣金甲陳兵於西興江岝張  
大旗有北嶺字賊不敢渡郡守劉忠顯公韜上其事  
賜令額紹興十二年以徽宗皇帝靈駕所由封顯應  
侯三十年加號以靈助

南殿保國資化威勝王廟在縣南五十里漢乾祐元年

吳越王建

崇安保善王廟在縣西四十五里

初平侯廟在縣東五十里

助勝侯廟在縣西七里

破虜侯廟在縣西北八里

蒙山東嶽廟在縣西三里

龍王廟在縣東四十里有龍井在山之巔

餘姚縣



城隍廟舊在縣西二百步今移在縣東北一十步

東嶽廟在縣東三里政和四年知縣事廖天覺建通直

郎顧復幾等捨廟基

緒山廟在縣西二百五十步祀典始於東晉咸康中有  
江都李泳者作記謂徽宗皇帝常夢禁中火有神人  
撲滅已雨奏曰臣越之餘姚緒山神黎明內廷果火  
會雨而止上異之有旨下本道訪求遂賜應夢之號  
泳字子永御史中丞定之曾孫諸父仕多通顯其說

宜不敢妄云

闕廟在縣西二里其初山闕大江有石入江流多為舟楫之害故邑人立廟於其所邑士莫君思去其石凡石之入水者鑿之殆盡今不復為害矣

保慶寧邦王廟舊在縣江南之東紹興五年知縣事朝奉郎陳時舉因江南數有火災徙在縣南門之側去縣八十步自此火不復作乾道九年知縣事宣義郎

留觀順重修

助海侯廟在縣江之北二百三十步地名鄧家嶼以其  
有功海上故邑人祀之會稽城中彭山亦有助海侯  
廟當是一神也

正順忠祐靈濟昭烈王廟即廣德軍祠山張王神也在  
縣西二百六十步慶元四年建祠山廟甚盛江浙間  
多有行廟祭者必誦老子且禁食彘肉云

南雷應瑞大王廟在縣南雙鴈鄉舊廟在大小雷山因  
溪水泛溢流水至此遷於今所傍有古大木特異木

根有穴可容數人穴有小潭或云神龍居之知縣事  
林迪因歲旱具酒與神對酌禱之甘澤隨至自後凡  
旱潦有禱多應

梁武帝廟在縣東七十里上林湖又有蕭帝廟在縣江  
南之東南五里竹山邑民稱為蕭帝廟

五靈廟在縣東二里

虞公廟在鳳亭鄉之石龜吳國虞翻之墓也

歷山舜帝廟在雲柯鄉事見古蹟門

千將軍廟在縣東北治山鄉

嚴子陵廟在縣之治山鄉安山橋有墓在廟旁一里詳  
具子陵墓

上虞縣

城隍廟在縣東五十步

舜帝廟在縣西三十五里

秦始皇廟在縣東南三里

蕭王廟在縣南五十里

梁王廟在縣東七里

霸王廟在縣西南五十里今廢

利濟侯廟在縣北二十五里今廢

朱侍中廟在縣北四十七里廟南二十步有學堂橋洗  
硯池邑人謂買臣嘗讀書於此廟西有大家歸然亦  
傳以為買臣冢然按史買臣吳人方是時吳屬會稽  
謂之會稽吳人則可謂之會稽山陰人則不可蓋朱  
侍中別自是一人非買臣也

陶朱公廟在縣西南七里

靈惠廟在縣東南九里本鳳鳴洞主廟乾道間禱雨隨

應知縣錢

似之以

以其事上府府以聞於朝賜今額

夏湖明府廟在縣南三十五里

纂風公主廟在縣西北六十里

夏蓋夫人廟在縣北五十里

通澤廣利侯廟在縣南五十里侯即方石聖官吳越封

通澤將軍熙寧八年封廣利侯有清獻趙公所撰記

立石於廟前石山雙立如筍高數百尺上有異花  
鄉人神之

正順忠祐靈濟昭烈王廟在縣西一里

朱娥孝女廟在縣南八里娥縣民朱四女年十歲冒白  
刃救祖母事具曹娥廟既配曹娥其後上虞邑人復  
為立祠政和三年增修有新定江公亮記

赤石夫人廟在縣北五里山腰有望夫石夕陽返照其  
色正赤鄉人異之為立祠



握登聖母廟在縣西南四十里握登山之巔舊傳舜母  
名握登生舜於姚墟因姓姚氏

蕭將軍廟在縣東南十四里將軍秦人諱閭與弟閭領  
兵東之上虞植金鞭於地而自誓曰化為黃竹吾當  
血食於此已而黃竹生焉黃竹嶺由此得名嶺去廟  
甚近廟有斷碑云吳太元二年縣令濮陽興立

順聖龍王廟在縣東八里

嵩城大王廟在縣西北六十里

崔長官廟在縣西六里

新昌縣

城隍廟在縣西一百五步

公塘廟在縣南四里

天嶽廟在縣西南七里

梅姑廟在縣西南二十里

康侯廟在縣東八里

張王廟在縣西南三里

陳姑廟在縣西二里

冢墓

句踐庶子冢在夫山

越絕記地距山陰縣三十里

按越世家句踐之

後為王子鼫與而庶子不得其名

大夫文種墓在種山越既霸范蠡蠡去之種未能去或讒於王乃賜種劍以死葬於是山故名

陳音冢在山陰縣西南五里是為陳音山音善射者孔曄記曰其冢壁猶畫作騎射之象也

灼龜公冢越絕云句踐客秦伊善灼龜者疑此是而其冢曰秦伊山者未詳按十道志當在龜山下

朱買臣墓在嵎縣北六里有石羊存焉今號石羊廟買臣吳人今墓在此姑以傳疑

嚴光墓在餘姚陳山輿地志云墓衛有石羊乾道中丞相史文惠公守越於墓側建祠堂自作碑屬錢塘虞似良書之似良字仲房有分隸名自言隸法專師逢童子唐仙人二碑

孟嘗墓在上虞縣西七里嘗字伯周別見

曹娥墓在會稽縣東七十二里自漢元嘉初縣長度尚  
改葬娥江浦道邊至今存焉墓所有翁仲對峙亭曰  
雙檜後人所封殖也

魏朗墓在上虞縣西北四十二里詳見人物門

謝夷吾墓在種山南

華鎮覽古云今府宅儀門下

夷吾將死救其家

曰漢末當亂必有發掘露骸之禍宜縣棺下葬子孫  
遵之故能獨全以至今云

虞國墓在餘姚縣西五里孔暕記云國為日南太守有  
惠政出則雙鴈隨軒及還會稽鴈亦隨焉其卒也猶  
於墓不去

朱雋墓在蕭山縣東洛思山郡國志云雋葬於此洛人

送葬登山望洛一嘆而絕也

孔暕記又稱雋為光祿大夫時遭母喪將洛下

冢師歸登山相望冢師去鄉既遠目極千里北望京洛遂縈咽而死因葬山頂然則洛思山者又為冢師

墓也今  
兩存之

劉剛墓在餘姚縣南八十里其妻樊夫人祔剛仕為上虞

令有道術能召役鬼神政尚清靜歲歲大豐民受其

惠其妻亦有道者

事見葛稚川神仙傳

葛仙翁墓在上虞縣西南四十里蒿公山之巔有石室

高丈餘狀如冢

虞翻墓亦見舊經夏侯曾先地志在餘姚羅壁山下

蓋縣南十有八里

丁固冢

十道志編在會稽

固山陰人少夢松生腹上謂人曰松

字十八公後果為司徒又名司徒冢

孔愉墓在山陰縣南二十九里愉仕至尚書左僕射世說所謂孔車騎乃其贈官也

阮裕墓在嵯縣東九里裕字思曠以疾築室剡山關金紫光祿大夫不就卒

山遐墓在蕭山縣北一十一里遐簡之子濤之孫也歷餘姚令東陽太守卒於官

許攸墓在蕭山縣東三十二里許詢之父攸晚居蕭山當是其墓



郝惜墓在山陰縣西南二十五里

謝安墓在上虞縣西北四十里史云安墓在建康梅岡  
此云安墓未詳按南史謝靈運父祖並葬始寧或是  
謝玄父子墓爾

王羲之墓在諸暨縣苧羅山孔暕記云墓碑孫興公文  
王子敬之書也而碑亡矣

支道林墓按世說在剡之石城山戴逵過之嘆曰德音  
未遠而拱木已積石城今屬新昌是為南明山

謝輔墓在山陰縣西三十三里晉太元中會稽內史

夏靜墓亦見舊經夏侯曾先地志云在蕭山縣東螺山

螺山者其形似也

戴顓墓在剡縣北一里王僧達吳郡記顓死葬剡山今  
石表猶存故王龜齡詩云千年戴顓墓三字道傍碑  
也

褚伯玉墓在剡縣白石山南史本傳云齊高帝於是山立  
館居之伯玉常居一樓上及卒葬樓所

謝康樂靈運墓在山陰縣西南三十二里靈運死建康  
蓋歸葬於此

羊玄保墓在蕭山縣西三十九里嘗為本郡太守

楊素墓在上虞縣西北五里亦見舊經或謂素死長安  
又非越人疑有同姓字者爾

徐浩墓在山陰縣南二十一里

賀知章墓在山陰縣東南九里其地因名九里墓在山  
巔鄉人呼為賀墓

康希銑墓在山陰蘭亭希銑會稽人歷饒海台睦四州刺史其碑顏魯公撰併書郡守吳奎得之王荆公及弟平甫賦詩而墓始著

石昉墓在新昌黃壇按公弼家譜墓前有柘樹生而內向覆墓如蓋每有登科者則柘生特枝一枝一人或二三枝則二三人云

吳越遜王侔墓在會稽秦望山按備史侔疾殂東府以王禮葬焉秦望一名天柱嶺特秀削侔之子孫多以

文詞知名建炎初裔孫伯言自北邙遷奉累世之喪  
歸祔天柱名士多有挽詞

蔡墓在上虞縣西十里世傳是蔡伯喈墓按邕固嘗避  
難至越然史載邕六世祖與其父及母死廬墓事不  
聞有墓在此也死獄中又不在越非漢蔡邕明矣太  
平御覽載人有夜坐論史忽有扣戶自稱蔡邕字伯  
喈者人曰死王允獄中非子耶鬼曰彼自是東漢之  
蔡伯喈也吾姓氏適同耳以此推之殆亦此類姑存之

近代冢墓

冢墓舊經所載外餘隨訪求所得書之故無前後之次亦有未盡書者尚

多當俟續書

會稽縣

太傅信王墳在會稽昌原村王諱璩以少保恩平郡王

判大宗正始賜府於紹興府後罷大宗正府如故進

少傅王薨遂贈太保信王以葬其加贈太傅則又慶

元之六年云

陸諫議軫墓在五雲鄉焦塢贈太傅

陸都官珪墓在袁孝鄉贈至太尉今改葬本縣鷺峰寺

前

錢內翰

希白

墓在天柱峰下子集賢

考遠

裔孫伯言祔

沈少卿

紳

墓在雲門

已上並見舊經

陸發運

寘

墓在富盛鄉

郎中

沅

祔發運墓

陸左丞

佃

墓在陶宴嶺

陸少師

宰

墓在雲門盧家嶼

知郡崧通判漫並祔少師墓

陸石師長民墓在上臯尚書塢

參議靜之提舉升之教授光之並祔石師墓

蘇計議師德墓在陶宴嶺

吏部玘祔計議墓

楊樞密愿墓在何山

知郡祐祔樞密墓

詹司諫亢宗墓在秦望山



詹太博

林宗

墓在鹿里

太監

駢

祔太博墓

梁師諫

仲敏

墓在秦望山

胡尚書

直孺

墓在秦望山

齊賢良

唐

墓在昌原

闕

翰臨

墓在昌原

闕

屯田瑩

墓在浪港山

傅編修

克咨

墓在石碁山

給事中

松卿

左藏

繪

並祔編修墓

王提舉

然

墓在五雲卿中竈

判官

滂

侍郎

淪

並祔提舉墓

王知郡

饒

墓在蔡村

韓樞密

肖

墓在太平鄉

韓左師

膺

墓在太平鄉

韓運使

髦

墓在太平鄉

富樞密

直

墓在古城

富知府

杞

墓在古城

張秘書

淵

墓在昌原

尹侍郎

暇

墓在龍瑞前峰下未仕時嘗封和靖處士

莫侍郎

叔光

墓在平水

孝子蔡定墓在觀嶺下

### 山陰縣

魏忠憲王墳在山陰法華山王諱

愷

孝宗第二子也初

自魏郎出判寧國府又判明州兼領雍州牧王薨有

旨宜於紹興善地權厝遂厝於天衣寺之法堂遣使  
輟祭且視寔焉

陸知郡

卷

墓在黃昉

齊尚書

執象

墓在昌原

傅銀青

傳正

墓在承務鄉

尚書

墨卿

祔銀青墓

宋修撰

煇

墓在九里

朱提學

興宗

墓在苦竹村

王中書

孝迪

墓在九里

陳中書

過庭

墓在黃枋嶺

王特進

俊又

墓在西山

尚書

佐

祔特進墓

司馬提舉

梲

墓在亭山

侍郎

俊

監丞

傳

祔提舉墓

呂顯謨

正己

墓在九里

曾文清公墓在道樹

大卿逢侍郎連並祔文清墓

杜太師墓在永昌鄉苦竹村

孫威敏公墓在承務鄉

陸太保昭墓在承務鄉左丞之祖四世葬此有陸氏大

墓碑

趙太師墓在承務鄉清獻公之祖與陸氏墳正相對亦

有碑

唐右史閻墓在蘭亭

唐運使

閻

墓在古城

石銀青

元之

墓在盛塘孫朝議

瑞中

寺正

邦哲

祔銀青

墓

石提舉

繼曾

墓在謝墅

李太尉

顯忠

墓在天衣山

嵯縣

石祠部

麟之

墓在昇平鄉

石尚書

公弼

墓在僊山

諸暨縣

定安郡王

令諲

墓在花山

馬郎中

純

墓在陶朱鄉

寺丞

延之

祔郎中墓

廖都丞

虞弼

墓在陶朱鄉

新安郡王

士衡

墓在陶朱鄉

姚太師

舜明

墓在長寧鄉

參政

憲

祔太師墓



安定郡王子濤墓在安俗鄉

蕭山縣

王兵部絲墓在縣西南八里

王侍郎弗墓在廣福寺傍

餘姚縣

胡尚書沂墓在澄溪

李莊簡公墓在姜山

陳侍郎蒙墓在化安寺

趙知府

考嗣

墓在鳳亭鄉

趙知府

師龍

墓在石堰

上虞縣

趙知府

考縉

墓在五夫山鳳凰村

豐郎中

誼

墓

潘經略

時

墓

趙龍學

繡

墓

新昌縣

石尚書 待旦 墓在仙桂鄉

朝議 溫之 朝議 牧之 金紫 衍之 太傅 象之 太博 亞之

大夫 景衡 並祔尚書墓

石祠部 景術 墓在高蟠

石知郡 彥和 墓在蒼嶼

石朝議 景衍 墓在蘭峴

石侍御 公揆 墓在仁山

石知軍 嗣慶 墓在石佛寺山

石少尹

考中

墓在蒼嶼

許知郡

從龍

墓在杜黃山

趙知郡

孟

墓在伍山鄉

石刑部

畫問

墓在小江

石檢詳

宗昭

墓在王公塢

太師賀孝敏王

士會

墓在山陰縣天衣寺法華山

節使滕國恭靖公

不微

墓在山陰縣東黃

直閣

不羈

祔恭靖墓



會稽志卷六

欽定四庫全書

史部  
會稽志卷七

詳校官監察御史臣沈孫璉

檢討臣德生覆勘

總校官知縣臣楊懋珩

校對官編修臣盧遂

謄錄監生臣吳拱極

欽定四庫全書

會稽志卷七

宋施宿等撰

宮觀寺院

道士所居為宮觀僧則曰寺院宮古者上下通稱

如父子皆

異宮儒有一畝之官觀本闕

之名仙人好樓居故道士亦稱之

南北朝又有

闕館闕

玄壇者今都下醴泉萬壽集禧之

類皆有道院以處其徒此外如丈人觀等亦或有之然不多置也寺本官置之名後漢浮屠初至洛陽館於鴻



臚寺及建精舍因冒寺名曰白馬寺隋更其名曰道場

若歐陽詢所撰西  
林道場碑是也

唐初復曰寺院五代以來寺院特盛

江南吳越閩楚建寺度僧不可勝計今以會稽一郡攷之凡梁開平以後稱造某寺賜某額皆錢氏割據時為之非真中國之命也故其多如此及地入輿圖乃有勅賜額宣和初既以僧尼為德士德女乃併改寺院為宮觀僧揣知必不久皆仍舊扁止易一字以應命而藏其舊字及還寺院名則復其初今會稽如戒珠寺等猶可辨也

宮觀

府城

天慶觀在府東南五里一百二十步隸會稽唐之紫極

宮也梁開平二年改真聖觀大中祥符元年正月改

曰承天觀時天書事猶未興也初景德五年正月

即祥

符元年乙丑左承天門天書降戊辰改元大中祥符以

其日為天慶節二年十月十四日詔曰朕以欽崇至

道誕錫玄符率土溥天期福祥之咸被靈壇仙館俾

興作以攸宜庶昭清靜之風永洽淳熙之化式營仙館以介民禧宜令州軍府監關縣擇地建道觀一所並以天慶為額蓋用節名也惟西京稱天慶宮餘悉為觀於是州以承天應詔五年閏十月九日詔曰近者告期中夕降聖皇闡昭示誨言備聞帝尊孝主隆於顯號奉先式煥於丕圖鴻緒發源既彰於累積綿區式教用表於欽崇天下州府軍監並於天慶觀置聖祖殿其殿內尊像及侍從並令玉清昭應宮降

樣其後遂著令諸州給閒田供齋厨藩鎮十頃餘七  
頃五頃官吏之官罷任並朝拜禁乘馬出入於天慶  
節士庶燒香庭中殿在觀之昊天殿北建炎初罷王  
清神霄萬壽宮詔迎長生清華像赴觀建炎三年十  
一月高宗皇帝駐蹕癸亥列聖御容至自東京亦迎  
赴天慶奉安云

報恩光孝觀在府東三里九十四步隸會稽陳武帝永  
定二年捨宅建名思真觀太平興國九年州乞改額

乾明以從聖節祝至尊壽詔俞其請崇寧二年改崇寧萬壽政和三年改天寧萬壽置徽宗本命殿號景命萬年殿紹興七年改報恩廣孝十二年又改今額專奉徽宗皇帝香火初天聖間章獻明肅皇后遣殿中使脩建用玉清昭應宮別殿小樣將成羨材尚多中使謂主觀道士曰當為奏陳別建道院於東偏道士唯唯而已他日復言之又不對中使不懌遂已道士者惜不知其姓名必賢者也

天長觀在府東南六里一百六十六步隸會稽唐天寶  
三載秘書監賀知章辭官入道捨宅置號千秋觀七  
載改今額初開元十七年從羣臣請以八月五日上  
降誕日為千秋節觀蓋用節名後改千秋節為天長  
地久節觀名從之觀常有客道士携草屨數十緡坐  
觀門有過者輒與之已而得屨者或有脚疾或胛瘍  
著之皆頓愈競相傳布而道士已失所在故至今俚  
俗謂天長為草鞋宮殿上像設竒古傳以為唐代所

塑如麻姑浮丘伯皆他宮觀所無郡人謂之土寶又殿中有小銅鐘範製甚奇聲尤清圓遠聞非凡鐘比嘗撲損匠者鋸為大罇聲仍如故汝陰王庶潛作八分書於鐘上惜其不為人所知今徙於他所矣

開元宮在府南四里一百二步隸山陰唐開元二十八年建宮舊極闊廣後多為民居所侵今所謂甲子巷者乃開元之六十甲子殿也

會稽縣

告成觀在縣東南七里政和四年二月敕改禹祠為告  
成觀靖康初元翰林學士翟公汝文守會稽作三清  
於正殿因設醮祭其青詞曰臣聞昊天有目之所共  
睹尚絕形容上聖衆妙之所圓成孰能體象敢以凡  
情之見解妄慕浩劫之高明深慮愚冥自貽誅譴伏  
念臣叨蒙覆幬粗識薰脩每嘆玄像之不傳莫慰羣倫  
之生敬力求繪素仰肖光儀用志歷年僅成茲事今  
者甫塵丹陛獲遂夙心竊惟高上至極之尊必示淵



默無為之相寫三清之垂拱用仿神威具萬德之莊  
嚴出臨霄極儻獲上通帝所克簡聖衷乞即頒降諸  
天普同供養咸瞻睟表永有依歸臣尚恐粉墨既焚  
閔藏雲闕復命工師再刻崇建琳宮流傳颺歛之姿  
安奉告成之宇庶存下士以廣真游臣誓願厯劫始  
終歸誠道蔭生身嗣續祇命玄科非敢萌纖毫僥福  
之心直以盡頂踵報天之實自稱小兆臣翟汝文又  
作真武像尤極精緻說者謂得天人粹溫之氣而陰

威肅然初建殿於西北隅後以奉安御書碑移殿西  
廡下南向殿之西南有井能愈疾一郡所崇事也餘  
具禹廟事中

龍瑞宮在縣東南二十五里有禹穴及陽明洞天道家  
以為黃帝時嘗建候神館於此至唐神龍元年置懷  
仙館開元二年因龍見改今額宮正居會稽山南峰  
嶂適率其東南一峰崛起上平如砥號苗龍上昇臺  
苗龍者不知其名唐初人善畫龍得道仙去大抵龍

瑞尤宜煙雨中望之重峰疊巘圖畫莫及故邦人舊  
語曰晴禹祠雨龍瑞舊有道士魏景暉能琴有行業  
紹興中郡幙洛人李樸贈之詩云惟有彈琴魏道士  
抱琴橫膝對斜暉朱希真敦儒頗稱之

千秋觀在縣東南五里乾道四年八月安撫使史丞相  
浩奏移天長觀舊額建其中為三清殿兩廡分享前  
代高士東廡曰高尚之士西廡曰列仙之儒凡四十  
一人故俗謂之先賢堂前有閣曰鏡湖一曲亭曰懷賀

嵯縣

金庭觀在縣東南七十二里孝嘉鄉道經云王子晉登  
仙是天台山北門第二十七洞天桐柏山洞中三十  
五里見日月下見金庭壁四十里唐高宗時賜名金  
庭觀宣和七年改崇妙觀舊傳王右軍捨讀書樓為  
觀初名金真館後改金真宮至宋齊間褚伯玉居此  
山三十餘年後游南嶽霍山復歸謂子弟曰吾從此  
去十旬當逝及期而終年八十有六

史言齊高帝迎之辭疾勅於剡

白石山立太平館  
居之與圖經少異

真誥云上虞吳曇者得許承一瓢

贈伯玉伯玉亡授弟子朱僧標歷代寶之可受一斛  
唐先天間遣女道士詣金庭觀投龍因見此瓢遂持  
以進今觀之東廡有右軍肖像又有墨池鵝池

桃源觀在縣城內東北四十步唐武德八年置號太清  
觀後廢漢乾祐三年重置仍改今額

諸暨縣

乾明觀在縣西二里紹興二十六年道士陳師惠建請

於朝移舊乾明觀額

餘姚縣

廣福觀在縣東七十步舊號聖祖下院其址在縣城內  
天聖中建熙寧三年用治平德音賜壽聖觀額廢於  
建炎兵火縣以弓手舊營易其址廣縣治紹興二十  
五年道士張襲明即所易新址重建三十二年以避  
太上皇帝尊號例改今額

祠宇觀在縣南七十里四明山漢人劉剛及妻樊夫人

上昇之地古有祠宇觀唐明皇天寶三年以其地險  
遠移觀於瀑布下故俗謂之白水宮本朝政和六年  
詔建玉皇殿蠲其雜賦初唐末有高士謝遺塵隱於  
是山之南雷

今有大雷峰亦不知南雷何在

嘗至吳中謂陸魯望曰

吾山有峰最高四穴在峰山每天宇澄霽望之如牖  
戶相傳謂之石窻故茲山名曰四明山中有雲二十  
里不絕民皆家雲之南北每往來謂之過雲有鹿亭  
有樊榭有潺湲洞木實有青櫛子味極甘而堅不可

卒破有猿謂之鞠侯於是魯望與友人皮襲美各賦詩九篇傳於世然今雖山中居人皆不知此異境界在何處與華山之華陽武陵之桃源無異蓋神仙所居可聞名而不可到也或謂山圍八百里四面皆七十峰其說出於近世莫可得而攷按今明州蓋以此山得名而山實屬會稽之餘姚縣正如眉州本以峨眉山得名而山乃屬嘉州之峨眉縣也又華州以華山得名華山高五千仞華州乃不見而同州反見之



故語曰世間多少不平事却被同州看華山亦此類也

上虞縣

天慶觀在縣南一里太康中獲金壘於上虞觀并國朝祥符二年詔天下立天慶觀縣亦許之故賜今名

新昌縣

鼓山真聖觀在縣西四里

寺院

府城

開元寺在府東南二里一百七十步節度使董昌故第  
後唐長興元年吳越武肅王建奏以開元復為大善  
寺而以此為開元寺蓋處一州之中四旁遠近適均  
重閣廣殿脩廊傑閣大鐘重數千觔聲聞浙江之湄  
佛大士應真之像皆雄峙工緻冠絕他剎歲正月幾  
望為燈市傍十數郡及海外商估皆集玉帛珠犀名  
香珍藥組繡髹藤之器山積雲委眩耀人目法書名

畫鍾鼎彝器玩好奇物亦間出焉士大夫以為可配  
成都藥市建炎庚戌北騎侵犯既退羣盜投隙而至  
遂焚不遺一椽今七十年雖繼興葺尚未能復初武  
肅王有浙東以董昌第為開元而以昌生祠為天王  
院及是同時廢於火亦有數焉

大中禹跡寺在府東南四里二百二十六步晉義熙十  
二年驃騎郎將軍捨宅置寺名覺嗣唐會昌五年例  
廢大中五年僧居玄詣關請僧契真復開此寺并置

禪院於北廡詔賜名大中禹跡且命契真居所置禪  
院寺門為大樓奉五百阿羅漢甚壯麗初釋氏自達  
磨至慧能以來傳禪宗然禪院皆寓律寺至百丈山  
懷海始創為禪居乃不復寓律寺契真亦懷海弟子  
是時禪寺雖創尚未盛行故猶寓禹跡北廡為禪院  
而已凡寺院冠以大中二字皆廢於武宗而復于宣  
宗者惟祥符非是紹興未曾文清公卜居於越得禹  
跡東偏空舍十許間居之手種竹盈庭日讀書賦詩

其中公平生清約不營尺寸之產所至寓僧舍蕭然  
不蔽風雨惟食奉祠之祿假三兩老兵給使令始終  
如一日公詩有曰手自栽培千箇竹身常枕簟一床  
書蓋寓居時所賦也

延慶院在府東南五里二百二十六步唐大中十二年  
台州刺史羅招權捨宅建

崇報院在府東二里一百九十四步開運四年司農卿  
周仁邈之妻許及其子從徽捨宅建名報恩後改今

額

大中祥符寺在府東北三里二百步唐中和二年僧可  
瑠建號中和水陸院後改稽山羅漢院周廣順三年  
改保聖寺開寶七年改法雲寺大中祥符元年改今  
額

圓通妙智教院在府東南三里一百五十步開寶八年  
少卿皮文燦捨地建號觀音院方唐之末皮日休避  
地吳越死焉其子光業為其國丞相裔孫公弼仕國

朝亦通顯文燦光業諸孫仕於其國者新唐書據小  
說以為日休誅死蓋誤也熙寧間太守趙清獻公具  
奏以禱祈之地賜額圓通紹興初車駕駐蹕宣賜御  
書金剛經板乾道八年府又以禱旱疫有應聞於朝  
加額妙智初有興福院與圓通隣久廢僅有一佛殿  
至是用主僧善超請併興福入圓通或云圓通本興  
福之觀音懺堂後寢盛別為院而興福日衰至無一  
僧乃併有之事之廢興有如此者亦可一嘆也

永福院在府東二百五十八步晉天福四年吳越文穆王建名光明院大中祥符元年改今額慶厯八年七月初五日朝旨永充天台教院有重建院記

隆教院在府東一里三百四十六步太平興國元年觀察使錢儀建號無礙浴院大中祥符元年改賜今額景德院在府東南六里七十四步唐天祐四年建鏡清開寶三年改福清院大中祥符元年改今額有十六觀堂趙侍郎不流之先嘗寓居侍郎實生於此及來



為守興葺之

明教院在府東南五里四十六步建隆元年錢塘縣令  
林仁憲捨宅建號彌陀院大中祥符元年改賜今額  
旌教院在府東南四里一百九十四步周顯德二年錢  
承裔建號法華懺院開寶三年改憲臺永壽院大中  
祥符元年改今額院舊植杏甚茂至今為杏花寺  
長慶院在府東南一里二百二十八步宋永徽二年建  
本晉尚書陳囂竹園因號竹園寺唐會昌五年毀廢

周顯德五年僧德欽重建號廣濟院大中祥符元年七月改賜今額

善法院在府東南四里二百二步晉天福七年吳越建為尼院號永寧本朝大中祥符初改今額熙寧八年併尼院入大慶以為僧院紹興初秦魯國賢穆大長公主寓第院中埽地得金塗銅塔

壽昌院在府東南五里一百四十六步漢乾祐三年建觀音吉祥院開寶三年建佛殿景德二年改今額

廣福院在府東南六里七十六步太平興國元年溫州  
刺史錢俛之子熙疎捨園建號俱胥院俱胥西域語  
也蓋錢氏所名及治平四年正月一日英宗皇帝受  
徽號德音私造寺觀及三十間以上有佛像者以聞  
賜名壽聖壽聖蓋英宗誕節名也故僧寺名壽聖者  
所在有之一州或至十數初前代及本朝有以誕節  
名寺觀者如千秋天長天清承天乾元之類雖間有  
之然不多也至壽聖始遍及天下崇寧間蔡京請郡

置一寺觀名天寧萬壽蓋權輿於此紹興三十二年  
六月高宗皇帝內禪移御德壽宮上尊號曰光堯壽  
聖太上皇帝是歲十二月詔寺院宮觀祠廟及鄉里  
坊巷官私亭館名有犯壽聖及德壽字者並回避又  
詔天下寺觀名壽聖者皆改為廣福云

法濟院在府東南四里九十六步至道元年邑人陳建  
捨園為台州萬年山解院天禧三年賜院額

悟本院在府東南三里三十四步唐乾符二年張希劉

審言共捨宅置號鏡水院開寶七年改明心院又賜  
今額佛屋戶上有題捨錢人姓名墨高去木一分許  
蓋歲久風雨摧剥木朽而字以墨覆故獨不動世傳  
華州西溪有亭蓋杜子美詩所謂鄭縣亭子者杜書  
板上墨字挺起尤高蓋此類也

福果院在府東南三里三十四步

右隸會稽

大善寺在府東一里二百一十步梁天監三年民黃元

寶捨地錢氏女未嫁而死遺言以奩中資建寺僧澄  
貫主其役未期年而成賜名大善屋棟有題字云天  
監三年歲次甲申十二月庚子朔八日丁未唐開元  
二十六年改名開元後唐長興元年吳越武肅王別  
創今開元乃復大善舊名建炎中大駕巡幸以州治  
為行宮而守臣寓治於大善及移蹕臨安後復以行  
宮賜守臣為治所然歲時內人及使命朝櫜陵猶館  
於大善乾道中蓬萊館成乃止獨太常少卿按行陵

下寓館焉慶元三年十一月寺僧不戒于火一夕煨燼

惟羅漢天王堂浴堂經院庫堂僅存

寺有塔亦俱焚或發其塔中地

得石刻乃越州龍興寺宋太始元年唐大中元年造塔大宋淳化三年十一月火焚塔寺俱盡景德元年重建石刻中間多斷闕不可盡讀按龍興寺與今龍興橋相近或謂提舉廨舍是也疑龍興塔俱焚後人取廢塔所募舍利佛國並以他舍利募于大善塔耳以棟上字觀之則大善自建寺以來未嘗有被焚之事亦未嘗名龍興也

報恩光孝禪寺在府南二里二百二十二步宋元徽元年製法華經維摩經疏僧遺教等與法師惠基于寶

林山下

即龜山亦名飛來山

建寶林寺時有皮道與捨宅連山

造寺山之巔有石岫岫有靈鰻禱雨多應旁有巨人跡錫杖痕會昌毀廢乾符元年重建因改為應天寺  
晉末沙門曇彥與許詢玄度同造甄木二塔未成詢  
亡久之岳陽王將至彥預告門人曰許元度來也岳  
陽亦早承誌公密示至州即入寺尋訪彥望而曰許  
元度來何暮昔日浮屠今如故王曰弟子姓蕭名譽  
師何故以許元度呼之彥曰未達宿命焉得知之遂



握手命入室席地王忽悟前身造塔之事宛若今日  
由是塔益加壯麗崇寧三年八月詔改崇寧萬壽禪  
寺三月八日又改崇寧為天寧每歲天寧節郡寮祝  
聖於此紹興七年改報恩廣孝禪寺俄又改廣孝為  
光孝專奉徽宗皇帝香火蓋以本天寧祝聖之地也  
舊有長老滋須者有高行會改當十錢為當五郡守  
召須及能仁長老密告之且曰聞二寺方大興造有  
未還瓦木工匠之直而蓄當十錢多可歸急償之明

日文字一出皆大折閱矣二人既歸能仁呼知事僧告以將赴他郡之請凡有負者皆即日償之於是出千餘緡與之抵夜乃畢得者皆喜明旦遣侍僧問天寧則曰長老歸自郡齋即以疾告閉方丈門熟睡至今猶未起也及令下須始以當五之數償負能乃大媿服

大能仁禪寺在府南二里一百四步本晉許詢捨宅號祇園寺後廢至吳越王時觀察錢儀復建號圓覺寺

咸平六年從知州事兵部員外郎康戩之請用承天  
節名改賜承天寺政和七年上后土號曰承天効法  
厚德光大后土皇地祇詔天下承天僧寺皆改為能  
仁寺蓋避后土號也是歲詔建神霄玉清萬壽宮以  
僧寺壯麗富贍者改建而越以能仁為之石刻御製  
宮碑奉安法堂上作朱漆樓閣嚴護正殿左奉長生  
大君右奉青華帝君侍立真人各二人側殿奉韓君  
丈人又繪左右仙伯及從官於兩序殿柱以金龍絡

之殿庭為醮壇殿門立二十四戟

用鎗石頭鑽金龍纏朱漆桿其桿上

青下綠彩畫雲鶴蛟龍仍綴五色帶五條每帶綴一銅鈴通長一丈二尺八寸殿上設威儀

金鉞玉斧五明扇九天寶蓋神鏡錦織飛空霓旌真境十絕靈幡朝天朱幢仙境降節紫金垂露如意尺

十種各二

築亭行符水名仁濟亭講堂名道紀堂經藏名

雲章寶室貨產名道業天寧天應天符寧貺元成節

各設醮醮多至千二百位自京師降青詞朱表御香

守閣及洒掃用禁軍文書入疾置守臣雖前二府但

稱勾管百步內禁襍戶及屠肆街衢責地分人掃除

車擔及庖厨宴集音樂采捕刑獄之具皆有禁道士  
知宮副知宮皆降勅差名曰長貳氣焰熏灼監司守  
臣通書啓送迎交謁如等夷方是時泗守葉默建昌  
守陳并秀守蔡繼皆為神霄道士所訟得罪至流竄  
歲用名香朱丹幣帛酒醴華果不可勝數紙札尤多  
一取以千計皆池表歛表之類不許以他所產充數  
猶退易不已遇特設齋道士襯錢自三十千至三百  
率無虛月靖康內禪始稍減削建炎中興赦書遂命

神霄復為僧寺遷像設於天慶觀而能仁寺復故州  
又有能仁院故郡人謂能仁寺為大能仁寺云

戒珠寺在府東北六里四十七步戴山之南本晉右將  
軍王羲之故宅或曰其別業也門外有二池曰鵞池  
墨池其為寺不知所始陳太建二年有僧定光來寓  
寺中耳過其頂擎銀像長立不卧寺之中為卧佛殿  
有所謂十大弟子者哀泣其旁或候氣或捫足而佛  
之父母亦在焉僧惠迪言方政和間道家盛時有道

士詰僧曰寺院皆祝壽之地乃為此狀何也當聞於  
州毀之有僧出曰此見道宮進天寧節祝聖疏首列  
道德經若干卷經中乃云上將軍處右戰勝以喪禮主  
之死而不亡者壽強梁者不得其死死之徒十有三  
以其生生之厚是以輕死民至老死不相往來如此  
類皆何等語汝乃殊不避何也道士掩耳而去寺有  
上方院熙寧中郡守程公師孟與法雲長老重喜來  
遊喜能詩乃擬程公體坐上立成曰行到寺中寺坐

觀山外山程公大喜又有竹堂雪軒宇泰閣皆一郡  
登覽之勝李參政漢老有雪軒詩曰四山環繞翠峯  
嵒想見凌晨雪未消八萬四千脩月手不知何處琢  
瓊瑤人推絕唱宇泰紹興中為士子肄業之地常十  
餘人策名巍科者相踵蓋山川之秀有以相之寺南  
百步有題扇橋蓋買扇老姥所居云

光相寺在府西北三里三百七步後漢太守沈勲公宅  
東晉義熙二年宅有瑞光遂捨為寺安帝賜光相額



給事中傅公崧卿退居北海里第去寺最近數杖屨過之

能仁院在府西北三里三百三十七步開寶六年觀察使錢儀建太平興國二年吳越給地藏院額大中祥符元年改承天政和七年五月改賜今額事在大能仁寺篇

廣教院在府西六里二百二十七步巖山東麓院後山壁刻字有曰唐景福元年歲在壬子准勅建節度使

相國隴西公生祠堂其年十二月十六日興功開山  
建立蓋董昌生祠也昌敗祠廢後唐天成四年吳越  
王錢鏐夢神人求祠宇或言祠本古天王院有魚池  
因建天王院大中祥符元年七月改通教院天聖初  
避章獻明肅皇后父名又改今額建炎末與開元寺  
同時廢于火紹興中院僧惠迪募緣再建佛殿西北  
隅山壁有陸少師題名石刻云盧駿元王源之吳廷  
瞻曹季明沈永道孫元禮陳志行陸伯鈞自戒珠寺

雪軒過竹堂登上方尋徑到此政和八年三月二十  
八日元鈞題盧公名天驥西安人以儒學進名重當  
世後避天字改名襄字贊元終于吏部侍郎時為浙  
東提點刑獄少師時為淮西提舉常平詠道名時升  
為部酒官有文學盧公遇之如交友遊覽必與俱後以  
子貴贈至太師吳國公

妙明院在府北三里一百七步開寶五年鎮海軍都指  
揮使陳志建吳越給光讚般若院額大中祥符元年

七月改今額佛殿東南有八角石井舊常有大珠夜風雨晦冥輒出照殿上及廊廡盡明或濬而索之勿得建炎兵亂有北客來居陞小兒死焉珠遂絕不出院本甚廣今非復舊址矣

觀音教院在府西北三里一百二十七步乾道九年有沈安中者捨所居請於府移會稽縣界圓通妙智教院舊額建

右隸山陰

會稽縣

泰寧寺在縣東南四十里周顯德二年建初號化城院  
又改為證道院建中靖國元年太師陸佃既拜尚書  
左丞請以為功德院改賜名證慈米芾書額寺門外  
築亭曰顯慶紹興初詔卜昭慈聖獻太后攢宮遂以  
證慈視陵寺而議者謂昭慈將歸祔永泰陵因賜名  
泰寧禪寺其後永祐永思永阜永崇四陵修奉皆在  
其地故泰寧益加崇葺云

淳化寺在縣南三十里中書令王子敬所居也義熙三年有五色祥雲見安帝詔建雲門寺會昌毀廢大中六年觀察使李褒奏再建號大中拯迷寺淳化五年十一月改今額寺有彌陀道場杭僧圓照書額門外有橋亭名麗句亭刻唐以來名士詩最多先唐時雲門止有此一寺今裂而為四雍熙者懺堂也顯聖者省經院也壽聖者老宿所棲庵也或謂雲門寺本面東主秦望而對陶宴等山如列屏障會昌廢寺後止

存一小殿面南未毀遂因附益以為寺非復舊址而  
舊址乃多犁以為田紹興中准僧勅為雍熙副院嘗  
因牛足陷得小銅維衛佛像于田中蓋古雲門寺地  
也凡寺額冠以大中者捨大中祥符外皆唐宣宗時  
所復會昌廢寺

雍熙院在縣南三十一里一十步初僧重曜于雲門拯  
迷寺之西建懺堂號淨名庵開寶五年觀察使錢

儀

叔之弟

廣之為大乘永興禪院

懺堂在今佛祖後法堂前當時觀音像猶

在  
雍熙二年十月改賜今額紹興元年六月賜故尚

書左丞陸公為功德院

陸氏功德院本在證慈至是證慈改為泰寧奉攢官乃改

賜是院時方立法應賜功德院者不許用有勅額寺院惟雍熙特賜

院有吳越忠懿王

在國時所貽書石刻其一曰報雲門山淨名菴長老

重曜今差人齎到白乳茶三十斤稜瓷香爐一隻衙

香五斤金花合盛重五十兩仍支見錢一百千文足

陌可親入懺保安遣此示諭不具押字付其二曰報

越國雲門山淨名庵長老重曜昨據節度使錢儀申



所請為官中入懺保安事具悉師心鏡絕塵衣珠無  
類脩釋氏務三之訓得淨名不二之宗泊掛錫寶坊  
棲真玉筍節使素欽於景行遠有闕聞國家因罄于

精誠遂可其請况竒峰正聳炎景斯煩非坐非行頗  
勞精進傾心引領尤媿忠勤今則再賜到乳茶三十  
斤乳香三十斤至可領也夏熱想得平安故茲告  
諭想宜知之不具押字付長老重曜此亦可略見錢  
氏下書境內之體錢氏自周世宗及宋興之後益務

尊戴中朝然其書猶不能無竊擬書詔之意故具載  
之院額錢惟治所書院前橋亭曰好泉亭亭扁蓋陸  
少師所題取范文正公詩林無惡獸住巖有好泉來  
之句又有牧庵朝陽亭及范丞相純仁兄弟章樞密  
案曾舍人鞏晁侍讀說之江少卿緯庶博士布題名  
錢氏據舊史雖封吳越國王然初不言會稽別稱越  
國於此見之史魏公家有當時金書法華經稱錢儀  
為判會稽府則又有會稽府之稱矣吳越備史又云

遜王移居東府似又稱東府也

顯聖院在縣南三十里周顯德二年於拯迷寺石壁峰  
前建看經院乾德六年賜號雲門寺至道二年九月  
改今額院後有王子敬筆倉實一智井有經藏甚靈  
異中間院常無主僧者久之郡牧毀其法堂以脩園  
館然經藏猶如故今院復小葺絕無產業僧童賴經  
藏以給云

廣福院在縣南四十里晉天福六年建初名上菴熙寧

三年六月以治平德音賜壽聖院額隆興元年例改  
今額雲門四寺相比廣福最在其上小而秀邃可喜  
傍又有雲泉雲峰菴皆幽勝

大禹寺在縣南一十二里梁大同十一年建會昌五年  
毀廢明年重建寺自唐以來為名刹西偏有泉名菲  
飲有亭覆之紹興中王編修鈺題大字刻泉上

天華院在縣東六十里周廣順二年建號無礙浴院至  
道二年十一月賜名天華院呂文靖公有賀家湖上

天華寺一一軒窻向水開之句今院乃在小市去湖  
差遠不稱此詩疑嘗移建云

東山壽寧院在縣東二十五里宣和五年陸祠部傳所  
建初蔡京為黨禁凡故二府臣寮名在元祐黨者皆  
奪坟刹例更其名為壽寧陸左丞證慈院其一也政  
和中詔皆復賜之額亦復其故祠部適以家貲建東  
山院成遂請於州以壽寧名之方建寺時祠部年逾  
六十方手植穉桂松人或笑之及歿年九十松皆為

喬木云

寶山證慈院在縣東七十二里曹娥鎮曹娥廟之旁米禮部節書額證慈本陸左丞寶山功德院名後以昭慈聖獻皇后攢宮改院名泰寧而徙額於此

大中昭福院在縣南一百里唐元和二年寧貢禪師建會昌廢大中八年文質禪師重建

妙峰寺在縣東七里唐光啓元年蔡郈等於古靈山寺基建靈山寺大中祥符元年改賜今額

福慶寺在縣東南七十里晉將軍何充宅也世傳充嘗設大會有一僧形容甚醜齋畢擲鉢騰空而去且曰此當為寺號靈嘉充遂捨為靈嘉寺唐會昌五年廢晉天福七年重建大中祥符六年改賜今額

隆慶院在縣東北二十里晉元嘉三年建號長樂寺會昌廢建隆元年重建號興福院大中祥符元年改賜今額

資壽院在縣東南七十里晉開運四年阮羅建乾德二

年吳越號資國院大中祥符元年改賜今額

護聖院在縣東四十里周顯德元年建院有塼塔因號  
千佛塔院大中祥符元年七月改今額

廣愛院在縣東南一百里漢乾祐三年於古寶安寺基  
上建號德政院大中祥符元年七月改賜今額

崇仁院在縣東南一百里唐龍紀二年建號相國永泰  
禪院晉天福四年吳越改瑞峰院大中祥符元年改  
賜今額



資聖院在縣東四十里漢乾祐元年建號證福院大中祥符元年七月改賜今額乾道九年改為禪院

普濟院在縣東北八十里孔浦後唐長興四年建號興福禪院大中祥符元年改賜今額

福聖院在縣東北八十五里纂風浦周廣順元年建顯德五年吳越給延壽院額大中祥符元年改賜今額慶恩院在縣東南九十里晉天福七年建周顯德元年吳越給報恩院額治平元年改賜今額

靈峰院在縣南二十二里開寶九年觀察使錢儀建號  
三峰院治平元年改賜今額

普濟院在縣東四十里乾德元年盧文朗建即晉鴻明  
禪師誦經之地將軍何充累詣聽經故號何山院乾  
德三年改雲濟院治中二年改賜今額

淨勝院在縣南二十里唐中和三年齊肇以其祖丞相  
杭書堂建號水雲塔院治平二年改賜今額

渚脩院在縣南一十八里周顯德五年集惠大師建號

福清塔院治平二年改賜今額

妙智院在縣東南二十五里晉開運二年建觀音尼院  
今為僧院治平二年改賜今額

淨住院在縣東北四十里齊永明二年建號靜念寺會  
昌廢漢乾祐三年陸君泰重建治平三年九月改賜  
今額

廣教寺在縣東二十五里晉開運四年建號善訓寺治  
平三年二月改賜今額

澄心院在縣東六十里唐景福二年吳越武肅王建周顯德五年改水心院治平三年二月改賜今額

華嚴院在縣東南七十五里咸通九年賜今額寺久廢後移五雲鄉今方廣院乃其子院爾

驚峰院在縣東南七十里唐大中五年建天祐六年賜號金峰院治平三年二月改賜今額

延安院在縣東南七十里建隆元年建號護國保安院治平三年二月改賜今額

崇勝院在縣東南九十里晉天福七年建號保安院治  
平三年改賜今額

九蓮院在縣東南七十五里建隆三年建號蓮花院治  
平三年二月改賜今額

佛果院在縣東南八十里乾德二年建號保福院治平  
三年正月改賜今額

清脩院在縣東南八十里晉開運三年建號清泰院治  
平六年九月改賜今額

寶林院在縣南一百里元豐元年州以三界鎮接待院  
奏請賜今額

化成院在縣東南四十里周顯德二年於古皇城院基  
建

石佛妙相寺在縣東五里唐太和九年建號南崇寺會  
昌廢晉天福中僧行欽於廢寺前水中得石佛遂重  
建治平三年賜今額石佛今在寺中高財二尺餘背  
有銘曰齊永明六年太歲戊辰於吳郡敬造維衛尊

像凡十有八字筆法亦工按會稽未嘗號吳郡

在隋嘗名

吳州然在此後百餘年

此石佛既得之水中又一人可負之而

趨者安知非吳郡所造而遷徙在會稽耶按天衣有維衛銅像雲門雍熙又嘗犁地得銅像亦維衛也蓋古多作此像者

稱心資德寺在縣東北四十五里梁大同三年建會昌中廢大中五年觀察使李褒奏重建稱心在唐為名山與雲門天衣埒宋考功之問守會稽時有遊稱心

寺詩曰步陟招提宮北極山海觀千巘遞縈繞萬壑  
殊悠漫喬木傳夕陽文軒劃清渙泄雲多表裡驚湖  
每昏旦問余金門客何事滄洲畔謬以三署資來刺  
百城半人隱尚未弭歲華豈兼玩東山芝桂芳明發  
坐盈歎考功詩名冠冕一代李適以為自康樂以後  
殆為絕唱此詩尤高絕信乎其似康樂也又有唐律  
二篇見集中雲門天衣至今遊會稽山水者必至焉  
惟稱心在海隅獨以僻遠寺又蕪第故詩人騷客有



終不一到者名亦晦而不彰豈獨人材有不遇哉

明覺院在縣東三十五里刺浮山唐開元十八年建會  
昌毀廢晉天福八年復建號大明院治平二年改今  
額有千歲和尚塔亦有碑而其說荒怪不可攷質然  
院頗幽絕可愛院門下數諸峰如柳柳州所謂林立  
四野者入門石壁屹立盛夏爽然如秋

隆德崇善寺在縣南二十五里昌源故皇叔祖信王琥  
功德寺慶元四年賜今額

崇福院在縣南二十五里

興福院在縣南一里一百步晉天福五年觀察使錢俛建號錢湖院大中祥符元年改賜今額今廢

山陰縣

天章寺在縣西南二十五里蘭亭至道二年二月內侍高班內品裴愈奏昨到越州見晉王羲之蘭亭曲水及書堂舊基等處得僧子謙狀乞賜御書收掌於書堂上建一寺舍焚修崇奉宸翰特賜天章寺額淳熙

十年重建御書閣奉安仁宗皇帝天聖四年六月十  
二日宣賜御書篆文天章之寺鐫刻四字牌額又紹  
興八年三月壬寅降到高宗皇帝御書蘭亭序石刻  
一本賜浙東安撫使孫近有近題跋勒石蘭亭曲水  
右軍書堂及畫像至今皆在或謂仁宗書此額時本  
書真宗御集閣為天章之閣既成聖意未愜再書之  
前本遂不用有內侍奏章獻明肅皇太后言越州天  
章寺天下名山今欲乞皇帝更書一寺字易閣字以

賜越州太后與上皆欣然許之此四字是也故老所傳如此

天衣寺在縣南三十里晉義熙十三年高僧曇翼結庵誦法華經多靈異內史孟凱請置法華寺至梁惠舉禪師亦隱此山武帝徵之不至有翼公所頂戴紫檀十二面觀音及梁昭明太子遺舉公金縷木蘭袈裟紅銀藻瓶紅銀瑠璃鉢至今具在又有金銅維衛佛像本西域阿育王所鑄浮海而至梁武以施山中儀

相甚偉今奉於西序宣和初詔改僧為德士寺院為  
宮觀銅鑄銅像期以十日盡輸官俄復命惟輸鑄而  
銅像悉獲存故維衛像至今嚴奉焉寺有十峰堂以  
山之十峰為堂名山下又有雙澗故曾文靖公詩云  
布襪青鞋蹋欲無看山看水未成疎十峰雙澗尤奇  
處萬壑千巘總不如淳熙七年詔以皇子魏惠獻王  
薨櫟於山中設置衛守且歲時加恩澤有差云

法雲寺在縣西北八里本名王舍城寺久廢吳越王時

有大校巡警見其地有光景乃復興葺開寶七年改  
名寶城寺中允陸公仁旺及弟大卿闕捨園地以益  
之大中祥符中改額法雲建中靖國元年大卿之孫  
拜左丞請為功德院每歲度僧一人建炎初金人入  
寇有三騎至寺主僧道亨不勝憤閉寺門擊殺之尸  
諸門金人後騎至遂焚寺道亨婺州人在法雲四十  
年度弟子三十二人寺焚復營葺不少挫未成而卒  
其後自修契爨繼之乃成道澤又建觀音殿鐘樓經

藏往時有重喜者不知何郡人為童子時擁篲掃廊  
忽渙然有省遂能詩有傑句元豐中居法雲嘗作詩  
曰地爐無火客囊空雪似楊花落歲窮拾得斷麻縫  
破袖不知身在寂寥中

本覺寺在縣西北一十五里梅山後唐清泰三年節度  
經略副使謝思恭捨宅建號靜明寺寺有雲峰堂以  
曾文靖公詩得名亦有曾公手書行記寺後有適南  
亭可以望海郡牧程給事建陸左丞作記又有子真

泉

智度寺在縣西北四十五里後唐天成三年建周顯德元年吳越改旃檀寺大中祥符元年七月改賜今額  
靈秘寺在縣北五十里梁大同十年將軍毛寶捨宅建  
會昌毀廢大中五年重建

寶壽院在縣西三十五里唐大順二年建天禧三年造  
殿號清化院景德二年改賜今額

寶嚴院在縣西一百二十五里晉開運二年建純一禪



師壽塔漢乾祐元年吳越給清化純一塔院額大中祥符元年七月改賜今額

奉聖院在縣南二十五里唐開元十六年建為玄儼律師度僧戒壇院會昌毀廢漢乾祐二年吳越重建改明恩院大中祥符元年七月改賜今額

延福院在縣西六十里新安鄉牛頭山之麓晉天福三年置開寶六年錢氏給安國院額大中祥符元年七月改賜今額建炎中廢於火紹興五年重建乾道五

年始畢工有石菴惑禪師安禪之地景德初贈太傅  
陸公軫與鄉士數人肄業於此嘗遇大雪絕食累日  
陸公禱山神明日獲二麕焉聞者嘆異及陸公直集  
賢院來守鄉邦遣衙致祭書堂在寺之西北隅今寺  
僧猶能識其處牛頭山產石可作假山其小碎者取  
為盆山尤宜草木皆蔥蒨耐久與崑山所出相埒東  
坡先生所謂盆山不見日草木自蒼然是也

寶壽院在縣西一百二十里唐貞元三年建周廣順三

年吳越給永豐院額大中祥符元年改賜今額

長壽院在縣東北一十五里晉天福六年鄒彥超建周  
廣順二年吳越給願果院額大中祥符元年七月改  
賜今額

廣濟院在縣西北五十五里晉天福六年于古福壽院  
基上建號聖壽院開運元年改嘉賓院大中祥符元  
年七月改賜今額

報恩院在縣西一百二十三里乾德四年竇珍捨地建

號彌陀院大中祥符元年七月改賜今額

廣利院在縣西一百二十里清化山開寶九年柳公訓  
捨宅建吳越給清化西塔院額大中祥符元年七月  
改賜今額

慈恩院在縣西一百二十里後唐長興二年謝君彥  
捨地建晉天福七年吳越給永安院額大中祥符元  
年七月改賜今額

延壽院在縣西八十二里後唐天成四年建號普安院

大中祥符元年改賜今額

等慈院在縣西一百十二里晉天福三年僧道山建號

天長院大中祥符元年七月改賜今額

資教院在縣西一百二十一里晉天福七年建漢乾祐

元年吳越給城山院額大中祥符元年七月改賜今

額

慶壽院在縣西六十五里開寶七年邵仁造捨山建號

烏石院大中祥符元年七月改賜今額

集善院在縣西北二十五里太平興國元年建

上方院在縣西北九十一里晉天福二年建

香林院在縣西四十五里漢乾祐三年建號寶林院治

平三年二月改賜今額

青蓮院在縣西南七十里唐乾符元年建號蓮華院治

平三年二月改賜今額

報恩院在縣西三十五里唐乾符三年建崇寧五年重

建

華藏院在縣西南二十五里唐咸通四年觀察使王龜建號華院治平三年改賜今額

安康院在縣西北九十三里後唐長興三年建

福安院在縣西北九十二里後唐長興元年於古棲隱寺基上建號資福院治平元年改賜今額

保安院在縣西北五十一里晉開運元年建號休寧院治平三月改賜今額

安隱院在縣西北一十里隋開皇十三年建唐武德中

重修會昌毀廢後唐清泰元年高伯興等重建號安養院治平三年改賜今額

崇教院在縣西九十里梁大同元年建尋廢周顯德五年鎮海軍都指揮使薛溫重建號新興塔院治平三年改賜今額東一百步有越王城

普香教院在縣西北五十三里乾德三年於古靈隱寺基上建開寶三年吳越給觀音普聞院額開寶六年改賜今額



鷺臺院在縣西四十五里晉乾祐三年建號重臺院治  
平三年二月改賜今額

資壽院在縣西一百四十里晉開運二年建號延壽院  
治平三年改賜今額

明因院在縣西南一百里晉開運元年建號遇明院治  
平三年改賜今額

壽量院在縣北九十七里後唐長興元年陳司空捨宅  
建

永興院在縣西北四十五里晉天福八年建

崇福院在縣西北五十里建隆三年衢州刺史朱仁幹  
建號浴室院乾德二年改法水院大中祥符八年十  
二月改賜今額

興教院在縣東南一十五里晉天福四年建號道林院  
即烏窠禪師道場治平二年改賜今額

興教院在縣西一百一十六里晉天福五年建號興善  
院治平三年改賜今額

惠悟院在縣西一百二十里周廣順元年建號全悟院  
治平三年改賜今額

顯慈資慶禪院在縣西三十里蘭亭皇祐五年樞密副  
使孫敏公奏乞建坊寺賜額

廣福院在縣西三十五里初僧思純造香林寮治平四  
年賜壽聖院額紹興三十二年例改今額

靈秘院在縣西三十里柯橋館之旁紹興中僧智性創  
柯橋接待院初惟蘧簾一廈日益增葺請于府移江


北安昌鄉靈秘廢院額智性年九十餘精神不衰猶能領院事淳熙十六年九月準尚書禮部符甲乙住持

龍興寺宋太始元年建號香嚴寺唐神龍元年改為中興寺神龍二年改為龍興寺初五王既誅張昌宗兄弟中宗反正復唐室稱中興故寺觀有名中興者已而武三思用事五王及禍遂以為母子相繼不得言中興凡名號有中興者皆改易如此寺是也然他郡

猶有至今謂之中興寺者蓋之東陽是也或是初不  
曾用後詔或是睿宗以後復中興之名不可知也會  
昌五年毀廢大中二年僧契真重建今廢為提舉司  
大慶尼寺在府城南三里三百步隸山陰西晉永康元  
年有諸葛姥日投錢井中一日錢溢井外遂置靈寶  
寺會昌毀廢大中元年觀察使李褒重建改今額及  
廢顯慶教院又併其尼入焉西偏別為教院用闕方  
規制選名行尼主焉頗習經學勵行業郡人稱之顯

教院本名保越尼皆以執織羅為業所謂寶塔羅是也乾道中以其院舍忠順闕而徙其徒于大慶又有善法尼院晉天福闕年吳越所建名永寧大中祥符元年改額熙寧八年知州趙清獻公以其幽迥非尼可居徙尼於大慶而院為僧坊又有觀音尼院在縣東南二十五里晉開運二年建今為妙智院亦僧居之山陰有寶積尼寺在縣北五里乾德四年觀察使錢儀建名執慈寺大中祥符元年改額又有崇教尼

院在縣西北五里二十步周廣順二年吳越武肅王  
建名惠清院大中祥符元年改額今並廢



會稽志卷七